

# Rumantsch grischun: Nagin entusiassem

■ (Iq) **Las votaziuns consultativas en vischnancas rumantschas n'han betg evotgà grond entusiassem per il rumantsch grischun.** Il linguatg unifitgà sco lingua da scola vegn refusà da la gronda maiorità da las vischnancas che han prendì pusiziun. Mo 28 da las 81 vischnancas rumantschas han dà suatientscha a la petiziun da la pcd giuvna da la Surselva ed han laschà vuschar consultativamain lur burgais davart quest problem che vegn discutà a moda contraversa en il Grischun rumantsch. Tenor comunicaziun da la pcd giuvna Surselva han 22 da 28 vischnancas refusà l'introducziun en

scola. Sulet las vischnancas da Luven, Schlans, Stierva, Casti e Tschierv beneventan l'introducziun. Quatter vischnancas han renunzià sapientivamain ad ina votaziun consultativa damai ch'ina tala ha nagina vigur legala. Entant che las vischnancas sursilvanas refusan cun 71% il rumantsch grischun, munta la maiorità refusonta en l'Engiadina ad 88%. Tut auter è la situaziun en Surmeir. En las duas vischnancas che han prendì pusiziun beneventan 63% l'introducziun dal rumantsch grischun en scola. La pcd giuvna da la Surselva ha surdà il rapport final a la regenza ed als deputads.